

R J E Š E N J E
o odbijanju Zahtjeva za odlaganje izvršenja Rješenja Konkurencijskog vijeća
broj: 01-05-26-643-I/09 od dana 21.07.2009. godine

Sarajevo
24. august, 2009. godine

Broj: 01-05-26-643-5-I/09
Sarajevo, 24.08.2009. godine

Na osnovu člana 42. tačka g) Zakona o konkurenciji («Službeni glasnik BiH», br. 48/05 i 76/07), i člana 18. st. 2. i 3. Zakona o upravnim sporovima Bosne i Hercegovine («Službeni glasnik BiH», broj 19/02) u vezi sa Zahtjevom za odlaganje izvršenja rješenja Konkurencijskog vijeća broj: 01-05-26-643-I/09, podnesenog od strane Ministarstva Saobraćaja Kantona Sarajevo, zastupanog putem Pravobranilaštva Kantona Sarajevo, Maršala Tita 28, Sarajevo, Konkurencijsko vijeće, na 93. (devedesettećoj) sjednici održanoj dana 24.08.2009. godine, je donijelo

R J E Š E N J E

1. Odbija se Zahtjev za odlaganje izvršenja Rješenja Konkurencijskog vijeća, broj: 01-05-26-643-I/09 od dana 21.07.2009. godine, podnesen od strane Ministarstva Saobraćaja Kantona Sarajevo, kao neosnovan.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 19.08.2009. godine pod brojem: 01-05-26-643-3-I/09, zaprimilo Zahtjev za odlaganje izvršenja pobijanog konačnog upravnog akta (u daljem tekstu: Zahtjev), podnesen od strane od Pravobranilaštva Kantona Sarajevo u ime Ministarstva saobraćaja Kantona Sarajevo (u daljnjem tekstu: Podnosilac zahtjeva ili Ministarstvo).

U podnesenom Zahtjevu Ministarstvo traži odgodu izvršenja pobijanog konačnog Rješenja u smislu člana 18. st. 2. i 3. Zakona o upravnim sporovima Bosne i Hercegovine («Službeni glasnik BiH», br. 19/02, 88/07 i 83/08) i traži odlaganje izvršenja konačnog Rješenja do donošenja konačne odluke Suda Bosne i Hercegovine po tužbi koja je dana 19.08.2009. godine podnesena Sudu Bosne i Hercegovine radi poništenja rješenja Konkurencijskog vijeća broj 01-05-26-643-I/09 od 21.07.2009. godine.

Podnosilac zahtjeva navodi da bi izvršenje pobijanog Rješenja Tužitelju nanijelo nenadoknadivu štetu koja se ne može popraviti, a da odgađanje nije protivno javnom interesu niti bi se njime nanijela veća nenadoknadiva šteta protivnoj stranci, te da su se stekli uslovi za primjenu člana 18. st. 2. i 3. Zakona o upravnim sporovima.

Konkurencijsko vijeće je u ocjeni predmetnoga Zahtjeva uzelo u obzir odredbe člana 18. Zakona o upravnim sporovima, i to:

- stav 2. koji glasi «Po zahtjevu tužitelja, nadležna institucija za provođenje izvršenja pobijenog konačnoga upravnoga akta, odgodit će izvršenje do konačne sudske odluke, ako bi izvršenje nanijelo tužitelju štetu koja bi se teško mogla popraviti, a odgađanje nije protivno javnom interesu niti bi se njime nanijela veća nenadoknadiva šteta protivnoj stranci....»; i
- stav 3. koji glasi « Nadležna institucija iz stava 2. ovoga člana može i iz drugih razloga odgoditi izvršenje pobijenog konačnog upravnog akta do konačne sudske odluke, ako to javni interes dozvoljava.»

Prema odredbi člana 18. stav 2. Zakona o upravnim sporovima Konkurencijsko vijeće može odložiti izvršenje pobijanog konačnoga Rješenja kada utvrdi da su ispunjeni kumulativni uslovi, i to da bi izvršenje nanijelo tužitelju štetu koja bi se teško mogla popraviti a odgađanje nije protivno javnom interesu, niti bi se njime nanijela veća nenadoknadiva šteta protivnoj stranci.

Konkurencijsko vijeće je utvrdilo da u Zahtjevu nisu navedene činjenice koje bi opravdale donošenje odluke o odlaganju izvršenja pobijenog Rješenja, u smislu člana 18. stav 2. Zakona o upravnim sporovima. Naime, Podnosilac zahtjeva, izuzev paušalnih navoda o postojanju štete koja bi se teško mogla popraviti, a da odgađanje nije protivno javnom interesu, niti bi se njime nanijela veća nenadoknadiva šteta protivnoj stranci, nije ponudio Konkurencijskom vijeću bilo kakve dokaze, koji bi ukazivali na štetne posljedice izvršenja pobijanog konačnog Rješenja .

Prema odredbi člana 18. stav 3. istog Zakona Konkurencijsko vijeće može odložiti izvršenje pobijanog konačnog Rješenja, ukoliko nađe da za odlaganje postoje drugi razlozi ,osim onih navedenih u stavu 2. istog člana.

Konkurencijsko vijeće nije našlo ni druge razloge zbog kojih bi se odgodilo izvršenje pobijanog konačnog Rješenja Konkurencijskog vijeća.

Slijedom navedenog, Konkurencijsko vijeće je ocjenilo da nema stvarnih razloga za donošenje odluke o odlaganju izvršenja pobijenog Rješenja, u smislu člana 18. st. 2. i 3. Zakona o upravnim sporovima, te je odlučilo kao u dispozitivu ovog Rješenja.

Pouka o pravnom lijeku

Protiv ovog Rješenja nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema odnosno objavljivanja ovog Rješenja.

Predsjednik

Dr. Stjepo Pranjić

Dostaviti:

- Ministarstvo saobraćaja Kantona Sarajevo, putem punomoćnika
- U spis
- a/a